

Naik taraf perkhidmatan feri, terminal dalam perancangan - Menteri

GEORGE TOWN – Sebanyak RM90 juta peruntukan Persekutuan untuk Prasarana Malaysia Berhad (Prasarana) melakukan kerja-kerja penarafan perkhidmatan feri dan terminal makan tertanggung sehingga firma Persekutuan itu menyelesaikan beberapa isu perundangan berhubung pengusaha terdahulu.

Mengulas lanjut, Menteri Pengangkutan, Anthony Loke Siew Fook berkata bahawa Kementerianannya telah memberi lampu hijau untuk projek penarafan tersebut, selepas Rapid Ferry Sdn. Bhd. (Rapid Ferry) iaitu anak syarikat Prasarana sejak 1 Mei 2018 mengambil alih operasi perkhidmatan feri dan terminal daripada Penang Port Sdn. Bhd..

“Telah saya adakan pertemuan dengan Prasarana dan Kementerian Kewangan baru-baru ini, Prasarana diberi kebenaran untuk meneruskan rancangan pelan penarafan perkhidmatan feri serta terminal Pulau Pinang.

“Sementara itu, Prasarana harus terus menyelesaikan masalah perundangan dengan pihak pengendali operasi sebelum ini... Prasarana perlu meningkatkan dana melalui saluran dalaman (kerana) ia melibatkan keputusan pada peringkat dasar.

“Kami (Kementerian) perlu menyelesaikan masalah perundangan antara pengendali semasa dan sebelum ini, sebelum boleh meneruskan (pelan penarafan feri dan terminal Pulau Pinang),” katanya dalam sidang media pada 23 Ogos 2019.

Sebelum itu, Siew Fook merasmikan acara pelancaran pas perjalanan tanpa had ‘Pas

Mutiara’ untuk kegunaan jenis pengangkutan awam bas Rapid Penang dan Rapid Ferry, dalam majlis yang berlangsung di Terminal Bas Weld Quay (Terminal B) di sini.

Selain itu, beliau turut meminta Prasarana menggunakan perbelanjaan pembangunan (CapEx) untuk menaik taraf feri sedia ada sebagai feri pelancongan selain membeli lebih banyak bot pengangkutan penumpang.

“Saya faham bahawa Pulau Pinang ada nilai sentimental terhadap feri, (justeru,) saya memberi jaminan bahawa perkhidmatan feri dikekalkan.

“Kita (Kementerian) merancang untuk menjadikan beberapa feri sebagai feri pelancongan, membawa penumpang tanpa kenderaan.

“Mungkin dua atau tiga feri sedia ada akan dikekalkan untuk mengangkut kenderaan,” ujarnya sambil memberitahu komitmen mewujudkan katamaran atau teksi air.

Bercakap pada sidang media sama, Ketua Menteri, Y.A.B. Tuan Chow Kon Yeow menyatakan bahawa pentadbirannya menyambut baik hasrat Siew Fook menaik taraf perkhidmatan feri, untuk diperhalusi oleh Kerajaan Negeri.

“Sebagaimana perkara yang diperjelas oleh Menteri, ia hanya rancangan, butiran belum dimuktamadkan,” jelasnya.

Kon Yeow memberitahu bahawa pada era 1980-an menyaksikan Pulau Pinang memang pernah ada kapal penumpang sahaja yang membawa orang awam ke Pulau Jerejak dan sebagainya.

Buletin Mutiara
1-15 September 2019